

Christi
Gottheit.
Joh. 1.

selbstendig vnd ewig Liecht verneinen / schenden vnd le-
stern. Hilff du ewiges Liecht / der du aus dem Liecht deines
Vaters bist / vor allen Creaturen entsprossen / vnd hast dich
in Feuerflaß von den Ervätern sehen vnd hören lassen /
daß wir mit deinen göttlichen Stralen vnd Glanz erleuch-
tet / in deinem Liecht vnd Wort wandeln / vnd dich aus den
Bildern / so vns die Schrifft fürstellet / recht erkennen / vnd in
warheit anrufen / vnd endlich deine Klarheit vnd Herrlig-
keit anschauen / vnd in dein Bild vnd himlisch Wesen durch
deines vnd deines Vatern wesentliche flaß / vnd göttliches
feuer verwandelt werden / vnd berühre heut unsere Lippen /
vnd fülle vnsern Mund mit deinem Geiste / damit wir dei-
nen Namen preisen / vnd den Christlichen Vergleuten / vns-
ern lieben Pfarrkindern / dich in der Propheten wort / vnd
deinen Metallen vnd Erdgewächsen weisen können.

Chafmal.

Was nun die Dolmetschung des worts Chafmal be-
langet / bleiben wir ditzmal bey dem Wort Electro, Denn
man gebe es durch das Wort Engel / oder helles Liecht / o-
der güldigen Silber / oder brinnenden Agstein / So haben
wir doch in allen diesen Creaturen Liecht vnd Glanz / da-
rinn sich der Sohn Gottes / ditz vnd ander mal offenbaret /
wie sich der Vater am Jordan / als das ewige vnd vrsprüng-
liche Liecht / auch im hellen Liecht / als wenn sich der Him-
mel auffehet / offenbaret / vnd der heilige Geist in fewrigen
Flammen / oder Zungen gestalt am Pfingsttage erschei-
net.

Matth. 3.

Actor. 2.

Geni 3.

Denn diese Creaturen haben alle ihr eingeschaffen
Liecht / wie auch die lieben fewrigen Engeln / ihre Strahl
von sich geben / wie Sternlein oder bebete Schwerter blin-
cken / vnd glenzen / wie denn Mose den Engeln so das Pa-
radis bewahreten / ihres schimmerns halben blossen schwer-
tern